



03. november 2020
Atassut

UKA 2020/51
Aqqalu C. Jerimiassen

Suliffeqanngitsunut matchgruppe 1-imiittunut erngerluni sulilersitsiniartarneqatorneqartalertuuppat aningaasaqarnikkut, allaffissornikkullu kingunerisassai misissorniarlugit nassuiaasiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UKA2021-mi Inatsisartunut agguanneqassaaq.

(Inatsisartunut ilaasortaq Simigaaq Heilmann, Demokraatit)

Sulineq imminut akilersinnaasuusaaq, imaangitsoq suliffissaaleqisutut nalunaarsorsimasoq pinngitsaalillugu sulisinneqassasoq sooq taamaannera paaseqqaanngivillugu. Sulinissanili nammineq kajungerilertariaqaraa suliassaraarput, qulaaniik naqittarnangu sulisinnanginnerarlugu suliumannanginnerarluguluunniit.

Partiit tassani talerperliit marluusugut assigiinnngissuserput nuisarpoq annertuumik, qanoq inummut isiginnittaaseqarneq eqqarsaatiginerullugu. Ajoraluaqaarlumi ilaatigut Demokraatit taamarsuaq inuit ilaannut isiginnittaasaasa ajortigisarnarat, inuit ilai naleqannginnerusutullusooq, eqiasuttutut suliumangitsutut tikkuartuilersillugit.

Uagut Atassummi inuk qitiutillugu sulinerput ingerlanniartarparput, suliumangitsutullu naqissusiiginnalersigata eqiasuttutulluunniit paaserusuttarparput, sooq inuk taanna taama maanna inissisimanersoq, imaangitsoq oqaannaqaluta inuk peqqissoq sulissasoq. Tassani talerperliit partiit inissisimarngini liberaliunnarata konservativiuuffeqartarnerput erseqqarinnerusarpoq.

Matchgruppenut agguariuseq periusaasoq maanna arlalitsigut nalilesorneqarsinnaaqaq, tassami suleriaannartulluunniit allaqqagaluaaraanni inuup maanna qanoq inissisimanagera eqqarsaatigineqarani suleriaannartulli isikkoqarsorinarpat ikkunneqartarami, imaangitsoq ilumut qannartamigut qanoq piareersimatiginersoq.

Matchgruppe 1-imiittut ilaqartarput inuttut suliassaqaangaatsiartunik, naak timimikkut nukissaqarluaraluarlutik tarnimikkulli nukissaqanngitsunik. Siunnersuummi assortorsinnaanngilarput, kinaluunniit atorfissaqartinneqartutut misigisimasariaqarpoq, tassuunlu assortuussitissaqanngivissugut taariiginnarneqarsinnaaqaq, ikiorsiissutinimmi nerlersuiinnarnissartaaq Atassummiik ornigisatoqarinngilarput, inuillu sulinerujuarnissaanniik kaammaatuarnissamik anersaaqartuullutattaq, akisussaaffimmillu inuup tiguisinnaalernissaa imminut napatissinnangorluni, imaassanngilarmi inuk systemikkut utaqqiinnartunnngorsangaassasoq. Atorfissaqartinneqartutut misigineq akisussaaffimmik malitseqarpoq, akisussaaffilli allamiilersarpoq nunatsinni qulaaniik aqutsinerujussuup eqiterussiniarnerujussuullu aqqani.

Tassanili mianersorfissat arlallittaaq eqqaamasariaqarpagut, tassalu sulileriaannartut allaqqagaluarunilluunniit 72 tiimit iluanni sulilerseqqinneqarniassappata, assersuutingalugu eqqakkanut katersinissanut assigisaannulluunniit pitinniaannassagutsigu nakerinngilluinnangaanut iliniarsinnaangatsigu, imaaqqinnaartariaqanngimmammi suliffissaaleqisuuguni tassa (automatiskimik) ilinniangaqanngitsooriissasoq, taanna toqqammavigissallugu Atassummiik isumaqarpugut annikiginarpallaangajattoq, imaassinnaammammi allaffimmiutut pisiniarfimmiutulluunniit ilinniangelik sulisunik ikilisaanerup aqqani eqqungaani kuusimasoq, sumiiffimmiutulluunniit ilinniakkaminut tulluuttumik atorfirmik pissarsineq ajulernini tunngavingalugu sivitsortumik unittoqqasoq piomassuserinngisaminik, taannalu ilimaginngivippara eqqaavilerititaanissani, nivannissani meeqperivinniluunniit taartitut sulinissani nakerissangaa.

Maanna taaniarneqartarpoq inuusuttorparujussuit systemip iluani nalunaarsoqqanngitsulluunniit suliffissarsiortutut, imaluunniit sulerinerinut sumilluunniit takussutissaqanngitsut. Tassanilu akisussaaffimmik suli inuiaqatigiittut suliassaqarnerput erseqqarippoq, akisussaaffimmimmi tigusunneqataasinnaaneq inuiaqatigiittut sumiinnersoq paasitittariaqarparput. Taamaattumillu kingumut takuteqqiinnarjarput, suli maanna naalangaaffinngorniarnermik ulapputeqarniarnerujussuup qanoq siusippallaartiginera, inuttaasut qitiutikkunnaarlugit nunamut qitiutitsiniarnerujussuup sammineqarpallaaqqimmat aningaasanik qanorluunniit malitseqaraluaaraagat.

Taamaammatt qiningaqatit aammattaaq kaammattorusuppakka, uagutaaq akisussaassuseqarpalaartumik sulinissatsinnik innuttaasut pillugit, nuna inoqanngikkuni ingerlajunnangilaq, nunamut tunngassutillit illikaallalaarlugit innuttaasunullu sammisumik akisussaassuseqarluta sulissasugut.

Majoriaq aqquotingalugu suliffissarsiortunut inississuisarnermi ilanngullugutaaq nalilersortariaqarput tassaavoq, ilumut suliffissarsiuussisarfinni naammattumik sulisuusunut atugassaqartitsinerluta, sulisinnaangorsaaqqiiniarnermimi suliartoriaannarnillu sulisitsiniaaneq inuttut nukippassuarnittaaq malitseqartartoq naluneqanngilaq. Akissaasersuinikkut sulinermilu atungassarititaasut inuup ataatsip sullitat qassit paarinerai eqqarsaatigilluartariaqarmat, inuit annertuumik unittoorsimasut sulileriaannartulluunniit allaqqangaluit qanoq manngertitarsinnaatiginersut utoqqatsissutissanillu taajuiinnalersinnaanersut ilisimaneqarmat. Annertuallaaqaarmi innuttaasunut suliniutinik suliqaarnialersilluta sullitassat kisiisa aallaaviginiarneqartarneri, puigorneqakkajuttartullu tassaasarmata atorfilitta suliffissarsiuussisarfinni qanoq inissisimanagerat, taakkua atugaat aaqqitsinnatigit suliniuteqarnernut inerneqarluartumik angusaqarfiusinnaanerata qalliartornera arriittuarallassaaq.

Taamatut Atassummiik oqaaseqarluta siunnersuut ataatsimiitsitaliamut innersuupparput.